

24
DISPUTATIO INAUGURALIS
de
COLICA PASSIONE,

Quam
Divina aspirante gratia


ex
DECRETO ET JUSSU
Magnifici, Nobilissimi, &
Gratiosissimi Collegij, quod Basileæ
est, Medici

Pro
SUMMIS IN ARTE SACRA HONORIBVS
& Privilegiis solenniter capeffen-
dis

Publico examini subdit

ANTONIUS KÜNZLINVS
Vitoduranus

Ad diem 15^o Novembris Anni 1671.
horis locisque ordinariis.



V I R O

*Nobilissimo, Amplissimo,
Prudentissimoq;*

DN. JOHANNI Steiner/
Urbis Vitoduranæ Prætori
meritissimo, Seni gravissimo, avo
suo honoratissimo

Consecrat

Cum omnigenæ felicitatis
apprecatione

ANTONIVS KÜNZLINVS
Vitoduranus.



THESIS I.

Non tot Attica mella, littus algas,
Montes robora, ver habet colores,
Non tristis Hyems riget pruinis,
Autumnus gravidis tumet racemis,
Non tot Spicula Medicis pharetris,
Non tot signa micant jacente noctu,
Non tot æquora piscibus natantur,
Non aër tot aves habet serenus,
Non tot Oceano moventur undæ,
Non tantus numerus Libissæ arenæ;

quot infortunia, & morbi homines macerant, inspi-
ce Lector amice sola intestina. Quot quæso malis
afficiuntur? Refrigerantur, inflammantur, obstru-
untur, adstringuntur, comprimuntur, intorquentur,
rumpuntur, ulcerantur, dolorem colicum patiuntur,
& Iliacum (miserere mei dictum): præterea tardè
dejiciunt, diarrhoëa, coeliaca passione, lienteria, dy-
senteria, aliisque cruentis & purulentis fluoribus af-
figuntur, ut & tenesmo, colliquatione, & vermibus
teretibus latis & tenuibus. Summa tantus est nu-
merus vitiorum harum tantum partium, ut diu ne-
sciverim, quod mihi eligere velim publicæ disquisi-
tioni offerendum. Tandem multas post cogita-
tiones placuit frequens humani generis hostis tru-
culentusque, Colica Passio scilicet, quâ laborantes
ita torquentur, ut clamoribus omnia impleant, pue-

rorumque more lugeant. De hac igitur impræsentiarum agam Theoreticè æque ac Practicè. Si quid erratum videbitur, aut id excusabo, aut meliora docenti obtemperabo.

II.

Ad Theoriam Colicæ Passionis pertinent, Nomen, Definitio, Differentiæ, Pars affecta, Causæ, Diagnofis & Prognofis. Ut posteriora prioribus non præponam, de his omnibus prius statuum, quàm ad praxin veniam.

III.

Nomen suum Colica Passio sortitur à parte affecta (intestino nempe Colo) de quo infrà plura. Meritò autem suam inde sumit appellationem, tum quia alii affectus à partibus suis, quibus inhærent, denominantur, Phrenitis, Pleuritis, Peripneumonia, Hepatitis, Nephritis, Iliaca passio, &c. tum imprimis, quia affectus à locis, quibus insident, specificantur.

IV.

Nominatur Paulo libr. 3 Cap. 45. *κωλικὴ διάθεσις*. Fern. libr. 6. Pathol. 10. *κωλικὴ ὁδύνη*. Hipp. Lat. libr. 4. Cap. 14. Morbus plenioris intestini. Aliàs dolor colicus dicitur, dolor intestinorum καὶ ἐξσχὴν, germanicè *das Grimmen*.

V.

Est autem Colica Passio, docente Capiuvaccio libr. 3. Cap. 30. tristis & corrupta Sensatio intestini Coli à solutione unitatis dependens.

Vel est dolor in intima abdominis parte per intervalla sævus admodum, aliàs fixus & terebro perforanti

foranti vel palo infixio similis ; aliàs per totum abdomen excrucians cum adstrictione alvi, nausea & vomitu.

Vel est dolor intestini Coli cum difficili exitu stercoris & flatuum. Hanc definitionem optimam & perfectissimam esse censeo. Constat enim ex genere proximo & differentia specifica & symptomate inseparabili. Genus proximum est dolor (symptoma in læsione tactus). Differentia specifica, intestini Coli. Hòc enim verbò & constituitur Colica Passio & ab Iliaco dolore, nephritico & uterino, aliarumque omnium partium doloribus distinguitur. Difficilem exitum stercoris flatuumque esse individuum comitem signumque pathognomon. omnes novimus. Est etiam hæc definitio ideò laudanda, quia omnibus, quas jam dabo, differentiis competit.

VI.

Dixi antea, nomine intestini Coli excludi ex definitione omnes, omnium aliarum partium dolores, & inter hos Iliacos, nephriticos & uterinos. Id quidem est verum. Sed quatuor hi affectus maximam affinitatem & similitudinem inter se habent, tantam, ut sæpè alter alterum mentiatur, præsertim in initiis, & peritissimi interdum decipiantur Medici, quemadmodum ipse Galenus fuit deceptus ; qui cum crederet se à calculo in altero ureterum impacto dolore affici, injecto sibi oleo rutaceo, gravissimo cum dolore excrevit humorem vitreum (à Praxagora sic appellatum) statimque dolore sedato cognovit neq; lapidem fuisse causam, neque in ureteribus aut renibus locum fuisse affectum ; sed in intestinis potius præcipuè in crassioribus. Atqui ex Divino Plat. & Arist. præcepto rerum differentium similitudi-

nes quærendæ sunt, & similium differentia. In quo ergò differunt tam similes dolores?

VII.

Ileus & Colica hòc differunt: In Ileo nausea, vomitus, dolor omnia majora, quia tenue intestinum magis sentit Colò. Quidam desipiunt, convelluntur compatiente nervorum principio: planè nihil descendit ad inferiora, & si vehementius distorquentur, stercus ascendit, Gal. de Ileo. In Colica accidentia non adeò sæva sunt, nec sic mali moris. Deinde Ileus est vicinior umbilico, & medium ventris occupat, & magis sursum vagatur: Colica potiùs in lateribus urget, quia Colon, in quo residet, tenuia intestina ambit, & ut Paulus inquit libr. 3. Cap. 43. à dextra Iliorum parte oriens, in modum zonæ ad sinistriorem excurrit, ut ægri nonnunquam se cingi & constringi putent, velut chordâ quâdam. His adde, quòd dolor Ilei magis fixus sit, quàm Coli, ipsoque rarior.

VIII.

Plura à Nephritico dolore Colicum distinguere possunt; 1. In Nephritide fit mutatio doloris ex gravante in punctorium, calculo è Sede in caput ureteris illapso: In Colica hæc mutatio non observatur; 2. Dolor nephriticus est acutior, sensumque exhibet aculei vel clavi infixi. 3. Stabilior, cum Colicus sæpè circuire sentiatur. 4. Angustiores locum occupat, Colicus è-contrà ampliorem. 5. Magis in dorso hæret, & ad posteriora vergit, conjunctamque habet difficultatem corpus flectendi & erigendi: Hic verò ad anteriora magis tendit. 6. aliqua semper adest mingendi difficultas.

tas, alvo fluente, cruris è directo stupor : In Colica
magis fæces alvi retinentur fluente urina, & 7. In
nephritico dolore tandem lapidem urina reddit
vel arenam vel cruorem; Sed Colicâ laborans talia
non emittit. 8. Dolor in loco renibus altiore manife-
stum Colicæ, non Nephritidis indicium præbet. His
adjunge ægri propriam dispositionem & præce-
dentem victus rationem & tantò certior eris.

IX.

Quod dolorem uteri attinet, communicatur is
inguinibus, coxis, & supra Ilia non ascendit, vapores-
que suscitando præfocationem uteri post se trahit,
quod in colica passione non fit, præcessit etiam par-
us vel mensium suppressio.

X.

Sunt insuper alii cruciatus, qui similitudine qua-
dam & vehementiâ Colici dicuntur, quibus tamen
non in colo intestino sedes est, sed in peritonæo, &c.
de Clariss. Fern. libr. 6. Path. Cap. V.

XI.

Si forte contingat, ut adeò abstrusa sit res & in-
dicata in principio, ut Medicus non possit esse cer-
tus, sit ne dolor Colicus vel nephriticus, vel alius ex
 prædictis, non tamen habent ægri, quòd sibi propter
incognorantiam metuant, quia sunt ad omnes istos
dolores remedia communia Gal.

XII.

Sic Nominis rationem habere & affectum de-
scribere volui, eundemque à similibus distinguere : jam
ad differentias confero, & reliqua, quæ ad Theo-
riam

riam spectant: Differentiæ petuntur à parte affecta à causis & doloris gradu. Ratione partis affectæ, existit vel intra duas tunicas intestinorum, tum dolor est valdè acutus & pertinax, vel in cavitate, tum mitior & magis est obediens: item vel fixa & stabilis, vel vaga & instabilis.

XIII.

Ratione causarum dividi potest in frigidam, qualis pituitosa (quâ Gal. 2. de locis affectis Cap. 5. se laborasse narrat. de qua supra in Thesi VI.) & flatulenta & quævis alia caloris expers: Vel calidam, quò pertinet biliosa & quam inflammatio intestini invexit. Biliosa malè habuit Heurnium Medicum, quem omnibus bonis commendo, ita enim loquitur super Aphor. 1. libr. 1. Hipp. numero 7. *Colicus à frigidis succis, rebus calidis verè fugatur; Colicus à bile natus à rebus calidarum accerima vi nascitur. Qua fronte hic Empiria ab his medicinam faciet! Certò scio me his non me vel le curandum dare, qui quoties raphanum vel piper comedit, ilicò in atrocissimum dolorem colicum trahor, absint à nobis illi, &c.*

XIV.

Ratione gradus doloris vel est vehemens & acuta vel remissa, & tantam vehementiam non habens, acuta iterum fuit illa Galeni. Nihil enim impedit, quo minus dolor acutissimus oriatur ex causa frigida. Quidam usque adeò vehementem sunt experti, ut vel animæ deliquiò comprehensæ mortui sint, vel sibi ipsis manus violentas intulerint Gal. sec. de composit. med. per loc. Cap. 1.

XV.

Pars affecta est Intestinum κώλον, crassorum secundum, ὁπὸ τῆς κολλάζεις, i.e. à torquendo dictum, propter hunc ipsum dolorem, qui in eo fit. Vel (ut aliis placet) à κωλύω remoror, quòd ob varias cellulas fœces aliaque in eo remorentur; oritur à coeco, & ad renem dextrum, cui adhæret, sub hepate reflectitur, & convolutum sub ventriculi fundo progrediens à sinistris lienis tenuissimis membranis nectitur, moxque in posteriora flectens ad renem sinistrum, cui etiam alligatur, descendit, & postquam duos gyros fecit, in rectum definit. Amplum est & laxum & pluribus extuberantiis seu cellulis donatum: ut esset flatuum & excrementi inutilis receptaculum, ne fœces assiduè excernere cogamur, propterea quoque ne impetu elabantur sursum primò fertur, deinde deorsum vergens iterum à sinistris prope finem ad superiora reflectitur, & hic loci gravissimi sunt dolores colici. Ad hujus ejusdem intestini principium Valvulam invenit Anno 79. Celeberr. Anat. Casp. Bauhinus, ὁ Μακαρίτης, (ex cujus institut. hæc mutuò sumpsi) datā à natura provida, ne excrementa ex gracilibus intestinis ad crassa delata, in alvi constipatione vel ventris compressione, quæ per musculos abdominis fit, in fœcum & fœtus exclusione, regurgitent.

XVI.

Causæ morborum sunt vel Internæ vel Externæ; Interna Conjuncta vel Antecedens. Illa immediate & proximè morbo adhæret, & si posita ponat & sublata tollat, Continens συνεκτική græcè appellatur. Continens causa Colicæ passionis est solu-

tio continui. Intestinum *κωλον* namque non ante dolet, quàm exuperantia materiæ, quam anfractibus & finibus suis excipere potest variam, distorqueatur & tendatur & in tumorem attollatur vel erodatur.

XVII.

Hæc, *προηγμένη* aliàs vocata, est propinquior vel remotior. Propinquiores Colicæ 4. recensentur à Foresto observ. lib. 21. obs. 2. in Schol. Totidem in Fernel. inveniuntur loco citato. Primò humor crassus & pituitosus, qui intra duas tunicas receptus magno cruciatu divellit & lacerat.

XVIII.

Secundò Spiritus crassus & flatulentus, qui si propter obstructionem aliisque de causis erumpere nequit, vi quoque intestinum distendit magno sensu doloris. Fern. eodem loco, cohibendi flatus consuetudine non paucos dissectione animadvertit, quibus dilatatum *κωλον* brachii amplitudinem adæquabat: Alios, quibus ex imo ventre flatus toto anfractu in ventriculum resiliens ructu emittebatur, & quibus pro crepitu ructus erat: Alios quoque aliis ex causis hoc symptomate continenter affligi, ut his plures ructus quàm verba essent.

XIX.

Tertiò humor acer & mordax & verè biliosus sua qualitate infestus & vehementer affligens & erodens.

XX.

Quartò inflammatio (è qua pus in Colo interdum fieri solet) quæ si in carne magnum dolorem tensione caloreque infert, quantum excitabit in intestinis

testinis partibus membranaceis & acuto sensu præditis?

XXI.

Præter jam dictas causas alia quoque notanda, quæ à Principe lib. 3. Fen. 16. tract. 3. c. 6. ponitur: *Nam fieri quandoque colicus dolor solet propter exiccatas & induratas feces, quæ exiccari quidem ac diu retineri in intestinis ob multas possunt causas; nimirum si vis expultrix infirma fuerit, vel medicamentis torpida reddita, vel privatione bilis, ut in Ictero, non irritetur, vel musculis ventris aut præcordiis percussis, vel frigore offensis, item ab aëre calido, à cibis assis, frixis, siccis, aromatibus, longa mora in iis, qui aliis rebus occupantur & sui obliviscuntur, porro ob sudorem nimium & vehementia exercitia, ab hæmorrhoidibus, ulceribus, & apostematibus sphincteris, colli vesicæ & uteri, &c.*

XXII.

Si quis autem quærat, cur fœces, quæ sunt in albo causarum externarum, hîc inferam, huic? respondeo hoc ideo à me factum, ut frequentiores colicæ causas simul redderem, ut Veteres imitarer: Deinde quia speciem causæ internæ ferunt, & suo respectu internæ nominari possunt, principaliter, quando ab interna causa retinentur & indurantur.

XXIII.

Ab herniis fieri nihil est novi.

XXIV.

Post has causas sequuntur aliæ internæ minùs frequentes: Vermes nimirum glomerati Colon infarciunt. Rusticum ex pago vulgo Coedyckio di-

Æto non procul ab urbe Alcmaria patria sua Forestus præ manibus habuit, qui ultra 30. vermes in colico dolore ejecit. Simile exemplum præbet Diana uxor lapicidæ apud Amatum Cent. 1. Cur. 33.

XXV.

Pariter lapides in intestinis geniti, officula & grumi sanguinis ex vulnere, &c. dolorem Colicum inducere possunt extendendo, continuum solvendo vel exitum ventositatum prohibendo. Gradus refert se in uxore Dom. Antonii de canibus Papiæ, in Colico dolore, qui nullo modo poterat curari, tandem lenientia medicamenta per clysteres immisisse & per os exhibuisse, quibus tres lapides magnos durissimos egressit, quorum quilibet fuit quantitatis unius ovi gallinacei, cinerei coloris, tanquam essent fæces induratae.

XXVI.

Causa προηγμένη remotior ea est, quæ in corpore existens, crassos & pituitosos humores, vel salfos & biliosos generat, vel flatus, genitosque fovet & auget, inq; inflammationem disponit, hujusmodi causa flatuum est caloris debilitas, inflammationis plethora.

XXVII.

Causæ externæ, sunt multifarii errores in diætâ; ambientis frigus, lapidi frigido insidere, frigidos pedes habere. Sic frater Foresti Theodorus, quotiescunque illi pedes frigebant, statim colicum dolorem incurrebat.

XXVIII.

Cibi crassi & adstringentes, densi & flatulenti,
salii

falsi & acres, facile corruptibiles; ut sunt, Castanæ, glandes, filiquæ, legumina, caseus, de quo Exemplum in Platero, melones, pepones, cucurbitæ, uvæ, omnesque fructus horarii. Huc spectant medicamenta acria & venenata: E. G. Scamoneum, de quo observ. vide in Foresto lib. 21.

XXIX.

Hic in memoriam revocare placet exemplum sine exemplo, quod Amicus communicavit Viri scil. Vinitoris civis Basileensis **Rudi Dürri genant** / qui per multos annos quæstus gratiâ, lacertas, serpentes, bufones, araneas, coria, ligna, lapides, cultros, clavos ferreos, absurdissima & durissima quæque devoravit integra vel prius in ore masticata, tandem atrocissimis doloribus tum Colicis tum pleuriticis correptus, diuque illis maceratus, tertio Jan. anno 1670. obiit miserrimè, in cujus abdomine aperto Medici Basileenses duos cultros invenerunt, unum in principio Coli infixum pure absconditum, alterum inferius in Sphinctere. Quis dubitabit, ex horum altero colica pessima laborasse. Sic aliis alia absurda nocuerunt.

XXX.

Aqua gelida idem facit, vinum aqua multa dilutum, vel ex uvis immaturis expressum, cerevisia non satis cocta & defœcata, pomaceum, piraceum recens.

XXXI.

De motu violento corporis ventre pleno, de quo otio non oportet dubitare promovere Colicam: Ut nec de excessu somni & vigiliarum. De fœcum retentione jam dixi suprâ, ubi simul indicavi, quid su-

dor nimius possit præstare. Ex ira lanius in Colicum dolorum incidit. Plat. 2. observ. Ergo etiam animi pathemata multum huc conferunt.

XXXII.

Venio ad Diagnosin & Prognosin. Diagnosin est rerum trium; affectus, partis affectæ & causæ. Signa affectus & partis affectæ sunt eadem, deprimi possunt ex superioribus ex quinta ad undecimam usque, supersedeo igitur illa hic repetere, & pergo ad signa causarum.

XXXIII.

Et hæc sunt: si crassa lentaque pituita, qualis est vitrea, dolorem parit, intestino adhærescit & ipsum corrodit, dilacerat, atque in id plerumque perforantis terebelli more se infigit. Hic dolor sæpè fixus est, & altè excruciat, nauseam & pituitæ vomitionem ciet: neque ructibus neque flatibus emissis demulcetur: habuitque originem à crapula & otio aliisque similibus, quæ cruditatem crassumque humorem progignunt. Fern. sæpius citato loco.

XXXIV.

Flatulentus dolor colicus ventrem distendit, vagus & instabilis est in variasque ventris sedes se contorquet: Flatus sæpius rugire & obmurmurare obauditur, & arctè conclusus, nec ab ore nec ab alvo erumpit: Hunc causæ flatus effectrices præcessere, discutientibus manifestè juvatur.

XXXV.

Ab acri biliosoque humore quisquis ortus fuerit dolor colicus, fixus etiam est, sed cum febricula ardore, siti, vigiliis: irritatur esculentis potulentisque ca-

que calidioribus, a quibus etiam sumpsit originem; his adde, quæ præcesserunt & ægri temperamentum.

XXXVI.

Inflammatiō eadem symptomata efficit sed magis intensā, fervorem in parte affecta, continuam non signavam, sitim majorem, bilis vomitum, qui nihil levat malum, cum urinæ & fœcum retentione, ab aliis causis tantum fœces subsistunt.

XXXVII.

Esse à fœcibus retentis & exiccatis, ex ægri relatione cognoscitur, si diu non dejecit propter causas allegatas.

XXXVIII.

Herniæ oculis objiciuntur.

XXXIX.

Vermes sua propria indicia habent, vide Bruel. de vermibus.

XL.

Calculi in intestinis geniti nulla arte cognosci possunt, nisi forte pondere & aliorum signorum absentia, & ægrotus antea à se excretos viderit. Sed sanguinem grumefactum indicabit Vulnus, &c.

XLI.

Causæ externæ & primitivæ ex ægri vel adstantium narratione habentur, si interrogantur de prægressa diætâ. Hoc modo etiam venimus in cognitionem causæ antecedentis remotæ.

XLII.

Prognosis est de eventu & malis, in quæ Colica mutari

mutari potest. Transfit autem aliquando in Paralyfin.

XLIII.

Aliàs rumpuntur intestina & fiunt ægri, sicut Hydropici, & foetent & moriuntur.

XLIV.

Lienteria post colicam etiam lethalis, vi digestiva & retentiva ablata.

XLV.

Singultus, syncope, palpitation cordis, mentis perturbatio & convulsio à Coli dolore, omnia mala. Veniunt autem hæc à foetore & dolore & μετασάσει materiæ.

XLVI.

Definit nonnunquam in rupturam peritonæi & facit herniam, sicut hernia Colicam.

XLVII.

Colica flatulenta magna ex parte curabilis, modò non prolongetur, tunc enim abit in tympanitidem.

XLVIII.

Colica pituitosa contumax admodum, præsertim intra tunicas hærens.

XLIX.

Quæ ex inflammatione originem duxit, atrocissima pariter & periculosissima. Mitior paulò quam biliosi humores produxerunt.

L.

A vermibus, curatu facilis.

LI.

A lapidibus pertinax, quia pondere suo quiescant in cellulis.

LII.

Si stranguria supervenit dolori colico septimo die intereunt, nisi copiosè urina fluxerit.

LIII.

Conclamatum est, si alvus ex toto suppressa, & vomitus perseverat, & foedi ructus & excrementa per os erumpunt, & tormina crudelia antecedunt, & sudores frigidi & animi defectus superveniunt.

LIV.

Atque hæc etiam de signis & prædictionibus totaque cognitione sufficiant, pergo ad curam, quæ facilis jam esse potest, sicut ex adverso

Ignoti nulla est curatio morbi.

Sed hoc in antecessum volo monitum, ut Colica celeriter, quoad fieri possit, curetur, quoniam ab omni arte aliena est comperendinatio, omnisq; hujus mali procrastinatio vitæ infert periculum. Præmoneo autem magis ægros, quorum culpa frequenter *evadit* elabitur, & morbus altas radices agit, viresque sumit, quàm Medicos bonos, fideles & Deum timentes, quorum officium est citò curare, quantum in ipsis situm.

LV.

Est autem Cura duplex, una à causa ad effectus, altera ab effectu ad causam, illam nominant ordinariam & rectam, hanc extraordinariam & coactam; quippe quâ non utimur nisi coacti Symptomatis ur-

C

gentia,

gentia:& quā passio præsens est dolor ventris sævus & intolerabilis & per consequens urgentissimum Symptoma,cogor extraordinariè procedere , & primò omnium doloris mitigationi incumbere,& postea causæ ablationi studere.

LVI.

Arripiantur ergo statim anodyna ita postulante Symptomate,laxantia & lenientia,quibus deliniatur & demulceatur dolor, interna & externa. Fiat initiū à Clystere ex radice lilior.herb. 5.emoll.fl camomill. sem. lini in aqua vel lacte coctis , addito oleo camomel. melle, vitello ovi & sale. Sed cur à Clystere cura inchoanda? Quia fæces eluit & dolorem sedando aliquid simul de causa eximit, addo quòd Colicus magis per injecta quàm assumpta secus quàm Ileus curetur.

LVII.

Et quare urgente dolore non forti clystere uteris ex benedict. laxat. &c? Postea locum habere potest dolore priùs sedato per blanda,nunc ejus usus omnino periculosus & prohibitus.

LVIII.

Rejeto Clystere sumat æger haustum ol. oliv. vel amygd.dulc.cum modico Sacchari.

LIX.

Dum hæc fiunt , externa applicentur, liniatur venter Ol. camomill aneth. vel Ung. de alth, aut resumpt. Fern: vel Sacculi imponantur ex fl. camomill.melil.verbasc.in sartagine calefacti & irrigati vino:vel panis tritic. medioc.coctus adhuc calens: vel &. residentiam decocti pro clystere , contunde & trajice

trajice per setaceum, & addita far. trit. & ol. lumbr. vel lilior. fiat cataplasma, in linteo calidè admo-
vendum.

LX.

His ad doloris mitigationem præmissis & si opus repetitis ad causæ ablationem festinandum est. Humor crassius frigidus & pituitosus, incidentia requirit, extenuantia & detergentia, quæ moderatè calefaciant, quibus præparetur, ut postea expurgari possit. Clysteri ergo secundo & sequenti addantur fol. hyssop. laur. major. menth. meliss. orig. puleg. &c. ol. commune in quo ruta sit incocta, hiera picra Gal. bened. laxat. &c. Ore capiat Syr. de duabus, de quinque rad., de stœch., conserv. cort. citr. ex aqua menth. meliss. aliisque idoneis. Corpore decenter præparato purgetur pil. de agaric. de aloë, de hiera cum agarico, vel ꝛ. med. sem. carth. ꝑ. sampf. cinam. garryoph. ana ʒj. coque in jure galli veteris & collaturam propina.

LXI.

Præter hæc quæritur, si vomitus possit prodesse? Negatur. Quin imò in quavis causa noxius est, excepta illa Colica, quæ post sumptum cibum fit, vel medicamentum acre.

LXII.

Sed quid de Narcoticis judicas? Quemadmodum in causa calida non satis laudari possunt aliis frustra adhibitis, ita in frigida hæc vituperantur, nisi quis ita corrigere possit, ut nil noceant.

LXIII.

Commendo in eadem causa Theriacam ex vino, Vinum Hipp. allium Rusticis benefecit.

LXIV.

Castoreum ex vini pauxillo omnino præstans remedium. Etiam topica superscripta juvant, vel infusus, semicupia, balnea parentur ex herbis idoneis & in egressu ægrotus ungatur.

LXV.

Si spiritus flatuosus doloris author fuerit, iisdem planè medicamentis utendum, nisi quod clyst. & topicis addi debeant, quæ flatus magis discutiunt, qualia sunt illa in Thesi 61. fol. laur. major. orig. puleg. item calaminth. thymi, cort. arantior, fl. cent. min. baccæ lauri & junip. Topicum egregium est emplastr. de bacc. lauri. Internè præterea conducunt aqua vitæ, cinam. spir. anisi.

LXVI.

Vbi dolor nimium urget à flatibus, cucurbita cum multa flamma subinde loco dolenti affixa juvat. *Videbitur tibi præsidium hoc in huiusmodi affectibus incantamenti cuiusdam simile quid efficere, sive in intestinis, sive in alia quavis particula fuerit excitatus.* Gal. XII. Meth. medend.

LXVII.

At quando biliosi & mordaces humores dolorem faciunt, Clyst. injiciantur refriger. acrimonia temperetur decoct. hord. pro potu ordin. Julepis item refriger. Emuls. ex quatuor sem. frig. Oleis blandis, jusc. pinguibus. Sic epicerausticis mitigati educantur infus. Cass. vel Rhab. in aqua endiv. cum syr. ros. sol. simplici.

LXVIII.

Aqua frigida mirè profuit in Uxore CENTURIONIS.

ONIS Genuensis. Amatus Cent. 1. Curat. 1. & in filio
Falconis. Idem. Cent. 1. Curat. 58. Et cur non pro-
fuisset?

LXIX.

Si his non curetur ad Narcotica veniendum, gr.
unum aut alterum Laudani Opiati, externis non
neglectis.

LXX.

Vbi inflammatio metuenda, fœcibus Clyst. re-
frig. eductis vena secetur. In cœteris pergatur, ut in
causa biliosa. Quando sic non potuit impediri & ad
suppurationem venit, & abcessus est ruptus, tractatur
ut ulcus internum. Interim applica topica ex mi-
rioribus.

LXXI.

Fæces retentas & induratas emolliet, attrahet-
que Clyster ex ol. communi, ex hydrelæo, mulsa aut
qui recipit juris carniū pinguis ʒix. Ol. olivar. &
mellis mercur. ana ʒj β. salis commun. ʒj. Bibat æger
jura pingua; jus Gallivet. in quo ʒj. polyp. querc. fuit
cocta, prunisve utatur dulcibus cum foliis fennæ co-
ctis. Ol. amygd. dulc. bibitum, injectum & admotum
laudabile. Si frustra, repete Clyst. adde pulpam
Cass. rec. extract. ad ʒj. &c. Si omnibus modis nil
efficere potes, utere folle fabrili (modò absit febris
& inflammatio) Accommodatur autem usus ipsius
in hunc modum: Canalem medicum folli fabrili
adaptato, & cum hæc feceris, ipsum aperito, quous-
que totum spiritu repletum conspexeris, atque tum
demum spiritum emittito utre compresso. Post
hæc ex hydrelæo & momento nitri Clysterem mox

inicies. Nam omnia, quæ in ventre & in intestinis continentur unà cum Clyst. evacuabuntur ut admireris.

LXXII.

Colico dolori à rupto peritonæo sic medendum: Intestinum reponendum, si non possit, stercore indurato vel flatu impediēte, Clyst. adhibendi & fortus ad relaxationem & ventositatem resolvendam applicandi cum spongiis. Deinde compressio intestino manibus leviter impulsio & reductio, plumaceolus vino styptico vel decocto balauft. nuc. cupr. gall. imbutus superligandus, etiam imposito emplast. contra rupturam & adhibito apto subligaculo.

LXXIII.

Colica à vermibus curatur ut vermes, Diaturb. cum Rhab. Infus. rhab. & sem. cynæ cum syr. de fl. persic: externè ol. rutac. & absynth.

LXXIV.

Lapides aliaque corpora dura, cedunt quoque lenientibus & laxantibus, vide Gradum.

LXXV.

Grumos sanguinis elicit Clyst. extergens ex decocto hordei & furfuris adjecto oxymel. simpl. Si vulnus adest, decenter obligetur.

LXXVI.

Tandem si cui Colica concitetur, ex Scammon. vel simili medicamento acri aut veneno, huic utile fuerit, statim omnium primò vomere beneficio aquæ tepidæ & ol. sesam. vel amygd. dulc. deinde confertim bibere juscula pingua, lac, lac amygdalinum

num tenue, decoct. hord. cum syr. rib. Ther. recentem prodesse nemo negabit.

LXXVII.

Sic quidem ex Pharm. & Chirurgia pro ratione indicationum utilia remedia produxi, sed nondum sufficit, oportet quoque diætā vires restaurare, quæ doloris vehementiā multū atteruntur. Attemperari autem debet diætā causæ. In causa frigida & flatulenta, victus sit calefaciens, attenuans, ex cibis coctu facilibus, boni succi, minimè flatulentis & glutinosis.

LXXVIII.

Convenit vinum generosum.

LXXIX.

Econtra in causa calida & φλεγματώδεις cibis & potus sit frigidus & humidus.

LXXX.

Quod reliquas res non naturales attinet. Aër sit moderatè calidus: somni & vigiliarum moderamen, vel somnus paulò longior: pariter de motu & quiete statuendum. Nam quies exercitiis melior. Excrementa naturalia naturaliter quoque se habeant. Quod de quiete corporis dixi, est quoque intelligendum de quiete animi. Passionum enim animi immoderatione, ut nihil aliud, ita nec Colica emendatur.

GLORIA TRIVNO.

1875-1876

1875-1876

1875-1876

1875-1876

1875-1876

1875-1876

1875-1876

1875-1876

1875-1876

1875-1876

1875-1876